

Kia rite ki te reehita, ki te pooti hoki



**ELECTORAL
COMMISSION**
TE KAITIAKI TAKE KŌWHIRI

ROE47 TAINUI 04/2026

He aha te take me reehita ki te pooti?

Mehemea kua reehita koe ki te pooti, ka whai waahi too reo ki ngaa pootitanga aa-motu, ki ngaa pootitanga aa-rohe, me ngaa taapaetanga pooti.

Ko ngaa pootitanga he aaheinga e whai waahi ai too reo ki te koowhiri ko wai hei maangai moou ki te Whare Paaremata, ki too kaunihera aa-rohe raanei, e kookiritia ai ngā take e ngaakau nui nei koe.

E maatua rangona ai too reo, reehita ki te pooti.



Ko wai e aahei ana ki te reehita ki te pooti?

Me reehita koe ki te pooti mehemea:

- kua 18 tau too pakeke, neke atu raanei, aa
- he kirirarau koe noo Aotearoa, he kainoho raanei koe e ai ki ngaa ture pooti, aa
- kua roa atu i te 12 marama koe e noho puumau ana ki Aotearoa i teetehi waahanga o too oranga.

He kainoho koe e ai ki ngaa ture pooti mehemea e noho ana koe ki Aotearoa aa-ture nei, aa, kaaore koe e mate ki te wehe i te whenua aa toona waa. Koia hoki te ture moo te tangata pupuru pane uruwhenua.

Mehemea noo Ahitereiria koe, noo Niue, noo Tokelau, noo ngaa Kuki Airani raanei, aa, kua roa atu i te 12 marama koe e noho puumau ana ki Aotearoa – e aahei ana koe ki te reehita ki te pooti.

Mehemea kei taawaahi koe e noho ana, ka aahei koe ki te reehita ki te pooti meenaa:

- kua 18 tau too pekeke, neke atu raanei, aa
- kua roa atu i te 12 marama koe e noho puumau ana ki Aotearoa i teetehi waahanga o too oranga, aa
- e kii nei koe: he kirirarau koe noo Aotearoa, aa, kua noho koe i Aotearoa i roto i ngaa tau e toru kua toohipa nei. **TEERAA RAANEI, he kainoho koe e ai ki ngaa ture pooti, aa, kua toro koe i Aotearoa i roto i ngaa marama 12 kua toohipa nei.**

E aahei ana koe ki te tono ki te reehita ka eke ana ki te 17 tau te pakeke.

Kia eke rawa koe ki te 18 tau te pakeke, ka aunoa too reehita atu, ka rite ai koe ki te pooti.



Te reehita ki te pooti mehemea he Maaori koe

Mehemea he Maaori koe, aa, kaatahi tonu koe ka reehita ki te pooti – e waatea ana koe ki te koowhiri i too raarangi pooti: te raarangi Maaori raanei, te raarangi whaanui raanei.

Ka tohua e too koowhiringa raarangi pooti:

- te rohe pooti e pooti ai koe
- ngaa kaitono hei koowhiringa maau.

Kia reehita rawa koe ki te pooti, ka aahei koe ki te whakawhiti i te raarangi pooti e noho nei koe.

Engari kaua:

- i roto i te 3 marama i mua i te pootitanga aa-motu, i te pootitanga aa-rohe raanei i ia 3 tau
- i mua i teetehi pootitanga paaerotanga aa-paaremata, mehemea ka whiti koe ki te rohe pooti e tuu ai te pootitanga paaerotanga.

He aha te paanga o too koowhiringa raarangi ki a koe?

I te pootitanga aa-motu, ki te koowhiri koe i te raarangi pooti whaanui, ka pooti koe i teetehi kaitono i te rohe pooti whaanui. Ki te koowhiri koe i te raarangi pooti Maaori, ka pooti koe i teetehi kaitono i te rohe pooti Maaori. Kotahi tonu te raarangi moo ngaa roopuu toorangapuu hei pootitanga maau, ahakoa te raarangi pooti e noho nei koe.

Ka whai paanga pea too koowhiringa raarangi pooti ki te raarangi kaitono hei te pootitanga aa-rohe. Ki te koowhiri koe i te raarangi pooti Maaori, aa, he waari Maaori, he marea pooti (constituency) Maaori raanei kei too kaunihera – ka pooti koe i ngaa kaitono o taua waari Maaori, o taua marea pooti Maaori raanei. Ki te koowhiri koe i te raarangi pooti whaanui, ka pooti koe i ngaa kaitono o te waari whaanui, o te marea pooti whaanui raanei.



E maaharahara ana raanei koe ki too haumaru matawhaiaro?

Mehemea e maaharahara ana koe ki too haumaru matawhaiaro, ki teeraa raanei o too whaanau, ka aahei koe ki te tono kia noho too ingoa ki te raarangi muna matatapu. Ka aata tiakina oo taipitopito reehita, aa, e kore e tukuna ki tangata kee.

Mehemea kei te raarangi muna koe, e kore oo taipitopito e kitea i ngaa raarangi pooti ka taangia. E kore hoki e aahei ki te tiroiro raanei, ki te whakahou raanei i oo taipitopito maa te ipurangi. Ka pooti ana koe, me oti i a koe he pootitanga motuhake, ngaatahi nei me teetehi atu puka ki too pepa pooti ake, e whakauu ai i te rohe pooti e reehita nei koe ki te pooti.

Toro mai ki **vote.nz**, waea mai raanei ki **0800 36 76 56** ki te tono paarongo anoo me teetehi puka reehita.



Me peewhea taku reehita?

He ngaawari te reehita, te whakahou raanei i oo taipitopito. Ka aahei koe ki te:

- reehita maa te ipurangi ki **vote.nz** ki too raihana hautuu waka o Aotearoa, ki too uruwhenua o Aotearoa, ki too tuakiri RealMe raaanei
- waea utukore mai raanei ki **0800 36 76 56** me te tono kia tukua teetehi puka reehita ki a koe.

Kia oti rawa i a koe te puka te tuhi, whakahokia mai ki a maatou. Ka mana ana too reehita, ka taapiritia too ingoa ki te raarangi pooti. Ko te raarangi pooti te raarangi e tohu ana ko wai maa e aahei ana ki te pooti i ngaa pootitanga. Me maatua noho too ingoa ki te raarangi pooti e aahei ai koe ki te pooti.

Me whakahou koe i oo taipitopito, i ia waa e huunuku ai koe ki whare kee.

Me maatua whakauu mai ki a maatou too waahitau iimeera me too nama waea e pai ai taa maatou whakapaa atu ki a koe moo ngaa reehitatanga me ngaa pootitanga.

Ka reehita tuatahi mai ana koe, ka whakahoungia raanei oo taipitopito, ana, ka tuku maatou i teetehi reta, i teetehi iimeera raanei ki a koe hei whakauu i oo taipitopito.



Me whai aawhina koe ki te reehita?

Ka aahei koe ki te tono i teetehi tangata e moohio nei koe, peenei i te hoa, i te whanaunga raanei, ki te aawhina i a koe ki te whakaoti i too puka reehita, maa taua tangata raanei too puka reehita e whakaoti.

Maau tonu raa te puka e waitohu.

Mehemea e moohio ana koe ki teetehi tangata kaaore e taea ana e ia tana puka reehita te whakaoti me te waitohu, he waimaero noo toona tinana, noo toona hinengaro raanei, ana, maau tonu pea ia e aawhina.



E hiahiatia ana eetehi anoo paarongo?

Moo te roanga atu o ngaa paarongo moo te reehita me te pooti:

- toro mai ki **vote.nz**
- waea mai ki **0800 36 76 56**

E waatea ana ngaa paarongo moo te reehita me te pooti i ngaa reo huhua me ngaa hooputu huhua i **vote.nz**

